


Tertib Surah	Nama Surah	Bilangan Ayat	Bilangan Ruku'	Makkiyyah / Madaniyyah	Tertib Turun	Bilangan Paragraf
Ke-75	Al-Qiyaamah	40	2	Makkiyyah	Ke-31	7



Zaman Diturunkan

Surah al-Qiyaamah adalah antara surah yang diturunkan di peringkat permulaan kehidupan Rasulullah di Mekah, di peringkat itu juga telah turun Surah ad-Dahr dan Surah an-Naba'. Pada bahagian permulaan dan terakhir Surah al-Qiyaamah terdapat tanda-tanda menunjukkan ia diturunkan setelah da'wah secara terbuka bermula iaitu sekitar tahun ke-4 Kenabian dan bahagian pertengahannya pula turun di zaman permulaan kenabian.

1. Ayat 1 hingga 15 turun setelah da'wah secara terbuka bermula, ketika itu pemimpin-pemimpin Quraisy menolak kepercayaan kepada adanya hari kemudian dengan nada mengejek dan perli, mereka bertanya **يَسْأَلُ أَيَّانَ يَوْمَ الْقِيَمَةِ** (Ayat: 6).
2. Ayat 16 hingga 19 turun di peringkat terlalu awal zaman kenabian iaitu ketika Rasulullah s.a.w. baru saja belajar menerima wahyu.
3. Ayat 20 hingga 40 juga turun selepas da'wah secara terbuka bermula.
4. Ayat 31 hingga 35 berkenaan dengan Abu Jahal, dia tidak membenarkan ajaran yang dibawa oleh Rasulullah, sebaliknya mendustakannya.

Perkaitan Surah Al-Qiyaamah Dengan Surah Sebelum Dan Selepasnya

1. Di dalam Surah al-Muddatstsir sebelum ini, pemimpin-pemimpin Quraisy seperti Walid bin al-Mughirah diancam dengan hari akhirat dan azab neraka, di dalam Surah al-Qiyaamah ini pula pemimpin-pemimpin Quraisy seperti Abu Jahal yang mendustakan ajaran Rasulullah diseru supaya berfikir dan bertanya hati kecil masing-masing tentang benar atau dustanya ajaran yang dibawa oleh Baginda. Di dalamnya juga kewujudan hari akhirat dibuktikan dengan dalil-dalil.
2. Di dalam Surah al-Muddatstsir sebelum ini, sebab-sebab penolakan pemimpin-pemimpin Quraisy terhadap ajaran Rasulullah ialah kerana mereka tidak takutkan hari kemudian **بَلْ لَا يَخَافُونَ الْآخِرَةَ** (Ayat: 53), di dalam Surah al-Qiyaamah ini pula disebutkan punca kepada penyakit itu ialah **كَلَّا بَلْ تُحِبُّونَ الْعَاجِلَةَ** (Ayat: 20-21). **الْعَاجِلَةَ** iaitu kehidupan dunia, mereka terlalu cintakan dunia dan lupakan akhirat.
3. Di dalam Surah ad-Dahr akan datang, manusia ditegah daripada mentaati pemimpin-pemimpin yang berdosa dan juga tidak bersyukur.

Beberapa Kata Kunci Dan Tema Utama Surah

1. **الْأَنفُسِ اللَّوَامَةِ** ialah jiwa atau hati kecil yang sentiasa mencela (Ayat: 2). Ia adalah satu naluri yang ada pada setiap manusia yang mendorong manusia mencela dirinya sendiri kerana melakukan sesuatu perbuatan keji. Sifat dhamir seperti ini mungkin lenyap apabila ia ditekan dan dihancurkan sehingga ia tidak berasa lagi ia sedang melakukan sesuatu perkara keji.
2. Perkataan **أُولَى** disebut sebanyak 4 kali sebagai menyatakan sikap Abu Jahal yang terlalu teruk dan mendukacitakan **أُولَى لَكَ فَأُولَى** (Ayat: 34), **أُولَى لَكَ فَأُولَى** (Ayat: 35).
3. Surah ini ditutup dengan beberapa soalan supaya manusia berfikir dan membuat pertimbangan dengan menggunakan hati kecil mereka supaya akhirnya mereka menerima kepercayaan adanya hari kemudian (Ayat: 40).